

Pressiteedüs 29. mai 2016

Võrokõisi suur kokkosaaminõ Uma Pido tõi Indsikurmu 7000 inemist

Eelä, 28. mail Põlvan Indsikurmu laululava pääl peet neläs Uma Pido tõi kokko 7000 inemist, kiä võrokeelitsel laulu- ja rahvapidol tundsõ' rõõmu umast rikkast kultuuriperändüsest ja ummamuudu ilmakaemisõst. Pido lavastus kõnõl' mõtsast ja väeliidsist puiõst ja lavastusõ korgpunktis oll' mõtsaliisi, ilmakuulsa ansambli Winny Puhh, mõtsa seest pidolõtulõk.

Uma Pido projektijuht Triinu Laan luutsõ inne pääkontsõrdi päälenakkamist, et pido lätt nii etteastjilõ ku päältkaejilõ henge ja kõnõlõs tähtsist asjust lihtsan keelen.. „Nii ka tõtõst läts ja tuu tege minno väega õnnõligus,“ rõõmust' tä pärän pito.

Winny Puhhi esinemisõ kotsile üteli tä, et kuulujuttõ tõtõst kõnõldi jo inne pito, et mõtsalisõ' võiva tulla' ja pido är tsurki. „A mu meelest pito är es tsurgita, oll' hoobis põnnõv, et esi muusika' ja stiili' umavaihõl kokko saiva',“ selet Laan. Winny Puhh sai pidolt säändse huu sisse, et tekk' lavalt är sõitõn Põlva liinalõ tsõõri pääle ja kontsert läts samal aol edesi.

Seo Uma Pido mõotas tulõvat aigu vast tuuga, et inämb inemiisi pidä meelen, et puiõ kasuminõ võtt hirmsalõ kavva aigu ja naid tulõ niisamatõ hoita, nigu mi ütstõist hoiami, löüdse Triinu Laan.

Pido pääkontsõrdil mängse pilli, laulsõ ja tandsõ kokko 3438 inemist. Ette kanti 26 võrokeelist laulu, minkast 21 olli valmis saanu õkva seo Uma Pido jaos. Kokko oll' laulvit latsi, naisi ja mihi lava pääl 3344, koorõ oll' pidolõ kirja pandnu 154 tükkü.

Tulõvanõ Uma Pido peetäs 2. juunil 2018 Võrol Kubija laululava pääl.

Võrokeelist rahva- ja laulupito peetäs 2008. aastagast pääle. Pido käü küläkõrda katõ Vana-Võromaa suurõmba keskusõ vaihõl. Edimene pido peeti Võrol Kubija lauluvälä pääl, tõõnõ pido oll' aastagal 2010 Põlvan Indsikurmun, kolmas pido 2013. aastagal jälleki Võrol Kubijal ja timahava jõudsõ pido vahtsõst Põlvahe.

Teedüst saa mano:

Triinu Laan

Uma Pido projektijuht

Võro Selts VKKF

tel 5332 2153

triinu.laan@wi.ee

Uma Pido kodoleht: www.umapido.ee

Uma Pido blogi: <http://umapido.wordpress.com>

Uma Pido Molovihun: <https://www.facebook.com/UmaPido-278039651663/>